

lent

Renungan Pra-Paskah




Penerbitan Kristian

Kita melangkah ke musim Pra-Paskah selepas satu tahun yang mencabar dan penuh dengan ketidakpastian. Angin perubahan dan ketidakpastian ini mungkin akan berterusan. Kita mungkin dibebani oleh tanggungjawab dan kekhuatiran. Namun, dalam semua perihal, mari lah kita terus bergantung kepada Yesus yang memerintah angin dan ombak. Mari lah kita menumpukan fokus pada pengarang dan penyempurna iman kita. Mari lah kita tetap setia di dalam hadirat-Nya dan mendengar bisikan lembut Roh Kudus agar kita dapat menjadi terang Tuhan dalam kegelapan yang menyelubungi kita. Semoga kita sentiasa bersyukur atas pengharapan yang kita peroleh dalam Yesus Kristus—Tuhan dan Penyelamat kita.

*Lembaga Ibadat dan Muzik (Board of Worship and Music)
Trinity Annual Conference (TRAC)*

Terbitan Pra-Paskah 2021





Mengapa Aku Melakukan Apa Yang Dilakukan Dan Apa Motif-ku?

Bacaan Alkitab: Yesaya 58:1-12

“Inilah puasa yang Aku kehendaki: tanggalkan belunggu penindasan dan beban ketidakadilan, serta bebaskan orang yang tertindas.” (Yesaya 58:6; BM)

Kita mendapati Tuhan tegas menegur Israel yang kononnya mematuhi cara-cara-Nya. Dia mencabar jurang di antara pengakuan iman mereka ketika menyembah Nya dan aksi mereka. Yakobus 2:17 (AVB) mengatakan “...*iman, jika tidak dinyatakan melalui perbuatan, maka sia-sialah iman itu.*”

Iman dalam Tuhan bukan sekadar suatu aktiviti hari minggu, tetapi ia adalah cara pemikiran yang baharu sama sekali—suatu perubahan paradigma. Kita bukan orang-orang berdosa yang diampuni, tetapi ciptaan baharu (2 Korintus 5:17), dikhaskan oleh Tuhan untuk tujuan kudus-Nya—wali. Melalui kebangkitan Yesus, KEHIDUPAN yang dicitikan oleh Adam dan Hawa dikembalikan oleh Tuhan kepada kita (Yohanes 10:10b). Kehidupan yang mengikut Kristus mencerminkan perwatakan Yesus dalam kehidupan kita. Orang lain akan melihat dan merasai kasih-Nya menerusi aksi kita. Kehidupan baharu ini memberi kesan ke atas seluruh raga kita—bukan sahaja dari segi kerohanian, malah sosial, mental, dan fizikal.



Mengapa kita melakukan apa yang dilakukan? Adakah kita berpuasa dan berdoa atas kewajiban atau keuntungan diri? Adakah kita melakukannya untuk menekan Allah supaya menjawab doa kita? Adakah kelakuan kita bebas daripada penglihatan Tuhan?

Tuhan, aku bertaubat kerana mempunyai motif yang hanya mementingkan diri. Tunjukkan semua kepura-puraan aku dan bantu aku untuk hidup dengan iman yang benar dan penuh kasih supaya orang lain boleh melihat Yesus dan memuliakan Nya. Amin.



Panggilan Untuk Pengakuan Dan Pertaubatan Bersekutu

Bacaan Alkitab: Daniel 9:1-14

“Kami telah berdosa. Kami telah melakukan kejahatan. Kami telah berbuat salah. Kami telah melanggar perintah-Mu, dan menyimpang daripada peraturan-Mu.” (Daniel 9:5; BM)

Sepertimana kita perlu membuat pengakuan dan pertaubatan persendirian, petikan hari ini menunjukkan kepentingan membuat pengakuan dan pertaubatan secara bersekutu. Walaupun Daniel sendiri tidak bersalah atas dosa-dosa yang ditampilkan, dia mengakui dosa-dosa Israel yang telah mencetus situasi yang sedang dihadapi oleh orang-orang Israel dan diri-nya yang hidup dalam buangan.

Dosa-dosa para pemimpin dan rakyat atau institusi membebani ‘tubuh manusia’ yang dipimpin dan diwakili oleh mereka. Kita boleh melihat contoh-contoh lain seperti yang tertera dalam 2 Samuel 24 (Daud membanci tentera-tentera-nya) dan Yosua 7 (Akhan tidak mematuhi perintah Tuhan) di mana tindakan mereka memberi kesan yang mendalam kepada bangsa mereka. Paulus menggambarkan Gereja seperti tubuh manusia dan mencadangkan bahawa seluruh tubuh akan terjejas apabila satu bahagian tidak sihat.

Gereja hari ini telah banyak berdosa terhadap Tuhan dalam pelbagai aspek. Berdoa lah supaya Tuhan membuka mata kita untuk melihat bagaimana kita sebagai Gereja-Nya (tempatan, nasional, dan global) telah berdosa supaya kita boleh mengaku salah dan bertaubat bersama-sama.



Bagaimanakah kita sebagai Gereja tempatan (selaku perhimpunan umat Allah) berdosa terhadap Allah dan perintah-Nya? Dalam masa yang sama, bagaimanakah kita berdosa selaku Tubuh Kristus global?

Tuhan, buka lah mata-ku untuk melihat bagaimana kita—selaku Gereja-Mu secara tempatan dan global—berdosa terhadap Mu supaya kita boleh mengaku salah dan bertaubat dari cara-cara kita yang jahat. Amin.

Berdoa Demi Tuhan

Bacaan Alkitab: Daniel 9:15-25a

“Ya Tuhan, dengarlah! Ya Tuhan, ampunilah! Ya Tuhan, perhatikanlah dan bertindaklah! Demi nama-Mu, ya Allahku, jangan bertanggung, kerana kota-Mu dan umat-Mu disebut dengan nama-Mu!” (Daniel 9:19; AVB)

Daniel memberikan gambaran yang menarik mengenai doa kita kepada Tuhan. Adakah kita berdoa demi diri sendiri, orang lain, ataupun Allah? Kata ‘demi’ membawa maksud sebab, tujuan, manfaat, atau ‘kepentingan seseorang atau sesuatu’. Ini juga menunjukkan motif doa dan syafaat kita.


Apabila Israel berdosa terhadap Tuhan dengan membina patung anak lembu emas, Tuhan dengan marah bertekad untuk memusnahkan mereka. Musa menaikkan doa syafaat—menyeru pada perwatakan dan janji Allah—yang Allah tidak sama sekali berminat untuk memusnahkan Israel, terutamanya demi Allah sendiri (reputasi-Nya). Demikian juga, doa pengakuan dan pertaubatan Daniel memohon agar Allah “menjaga reputasi-Nya” (bukannya Allah benar-benar perlu menjaga reputasi-Nya) berdasarkan siapa Allah dan janji-janji-Nya, demi Nya.

Apabila kita berdoa dan menaikkan doa syafaat, kita menyeru Tuhan untuk bertindak demi nama-Nya kerana kita tidak layak mendapat apa-apa dari Nya. Kita menyeru Tuhan untuk bertindak dan bercampur tangan berdasarkan siapa diri-Nya—penyayang dan penuh dengan belas kasihan dan rahmat—dan komitmen kukuh Allah dalam menunaikan janji-janji-Nya. Tuhan dan Firman-Nya adalah SATU! Matlamat utama doa kita adalah untuk memuliakan Yesus.



Kita berdoa dan menaikkan doa syafaat demi siapa? Demi diri sendiri, orang yang didoakan, ataupun Allah? Kita perlu menilai semula motif doa dan syafaat kita.

Ya Tuhan, ajari aku untuk berdoa dengan berkesan supaya nama-Mu dimuliakan. Amin.



Menyeru Berdasarkan Perwatakan Tuhan

Bacaan Alkitab: Mazmur 25:1-10

Janganlah ingati dosaku di usia muda dan keingkaranku; ingatilah aku dengan kasih-Mu, demi kebaikan-Mu, ya TUHAN. (Mazmur 25:7; AVB)

Susulan renungan semalam, Daud menyeru berdasarkan perwatakan Allah dalam mazmur ini (dan Mazmur 143) untuk kes-nya demi kebaikan Allah. Pengetahuan dan hubungan intim Daud dengan Tuhan bertambah kukuh sejak diri-nya masih seorang gembala di ladang di mana dia mengalami kasih dan perlindungan Tuhan. Ini memperlengkapkan dia untuk berhadapan dengan Goliat tanpa ketakutan di samping pelbagai cabaran lain yang dihadapi oleh dia sebelum dilantik menjadi raja. Dia semakin mengenal Tuhan sebagai Allah yang boleh dipercayai, penyayang, teguh, baik, jujur, setia, dan benar. Allah...

- tidak akan membenarkan kita dihina,
- akan menunjukkan cara-cara-Nya,
- akan mengajar kita jalan-jalan-Nya,
- akan memimpin kita ke arah kebenaran,
- dan akan mengampuni dosa-dosa kita.

Tuhan menghendaki kita mengenali Nya dengan intim. Ini membentuk asas kepada hubungan kita bersama Tuhan, lantas memupuk tumbesaran kita untuk menjadi insan yang dicipta oleh Nya—penuh rasa selamat, bererti, dan diterima oleh Tuhan. Mengenali Tuhan secara intim membolehkan kita melihat kehidupan dari perspektif-Nya dan memberi jaminan yang menenangkan bahawa Dia ada bersama kita sepanjang perjalanan di bumi.



Tuhan mengenali kita secara intim tetapi sejauh mana kita mengenali Dia? Kita mungkin tahu banyak tentang Allah tanpa benar-benar mengenali Nya. Seperti hubungan yang lain, mengenali Tuhan memerlukan masa dan komitmen. Adakah kita sanggup?

Tuhan, ajari aku untuk mengenali Mu dengan intim agar aku dapat mencerminkan perwatakan-Mu dalam menyayangi orang lain.
Amin.



Ahad Pertama dalam Pra-Paskah

Aku Pasti Ingat Akan Kamu

Bacaan Alkitab: Kejadian 9:8-17

"Inilah tanda perjanjian yang Ku adakan antara Aku dengan kamu dan dengan segala makhluk hidup yang ada bersama-samamu, turun-temurun, untuk selamanya..." (Kejadian 9:12; AVB)





Penderitaan Yang Benar

Bacaan Alkitab: Ayub 4:1-21

“Tetapi sekarang engkau ditimpa geruh dan engkau kesal, dirimu yang terkena dan engkau terkejut.” (Ayub 4:5; AVB)

Dugaan dan kesusahan sememangnya lumrah hidup. Tiada sesiapa yang terkecuali. Jadi, bagaimanakah harus kita bertindak apabila berlakunya kesusahan ataupun sesuatu menjadi tak kena? Ramai yang salah sangka bahawa Tuhan akan **senantiasa** memberkati mereka yang benar dan tiada kecelakaan akan menimpa mereka yang setia dan taat pada Nya; yang buruk hanya berlaku pada orang jahat.

Sesungguhnya, dalam situasi yang susah, kita patut menilai hati kita jikalau telah melakukan dosa secara sengaja atau tidak sengaja yang mungkin telah mencetuskan situasi tersebut. Jika ya, kita perlu mengaku dosa dan bertaubat sebaik sahaja Roh Kudus mendedahkan nya kepada kita. Tetapi, jika seperti Ayub di mana tiada dosa yang dikesani, ingat lah tentang persemukaan antara Allah dengan Setan di sebalik tabir yang tidak disedari oleh Ayub (Ayub 1-2).

Mengapa Tuhan membenarkan peristiwa itu berlaku merupakan hak-Nya tersendiri, tetapi Dia penuh yakin bahawa Ayub akan tetap setia. Tuhan berfirman bahawa rancangan-Nya dan cara-Nya adalah lebih tinggi daripada rancangan dan cara kita (Yesaya 55:8-9). Alkitab menyatakan bahawa kita sebagai pengikut Yesus tetap akan diduga oleh penyeksaan, penderitaan, dan kesusahan dalam hidup. Tuhan menggunakan dugaan-dugaan ini untuk membina kita menjadi orang yang diperkenan Nya.



Apabila kita menghadapi kesusahan, penyeksaan, penderitaan, dan kesakitan, usah bertanya mengapa semua ini berlaku. Sebaliknya, kita harus meminta Tuhan untuk menunjukkan apa yang Dia sedang mengajar kita.

Ya Tuhan, aku mengaku Engkaulah yang berkuasa sepenuhnya. Bantu aku supaya tidak tertumpu kepada situasi yang dihadapi, sebaliknya kepada pengajaran-Mu agar aku menjadi orang yang diperkenan oleh Mu. Amin.

Penderitaan Mungkin Membina Disiplin —Tetapi Bukan Selalu!

Bacaan Alkitab: Ayub 5:8-27

“Sesungguhnya, berbahagialah orang yang ditegur Allah. Maka janganlah kau pandang rendah didikan Yang Maha Kuasa.” (Ayub 5:17; AVB)

Ayub yang dianggap ‘*tulus*’ dan ‘*tidak bercela*’ oleh Tuhan masih menerima “ketenangan” yang diberi oleh Elifas. Malah, Elifas menggalakkan Ayub untuk merayu kepada Tuhan dengan menyenaraikan keajaiban dan mukjizat-Nya sambil menggambarkan cara Dia menghalang rancangan yang licik. Elifas menekan bahawa Tuhan mungkin membenarkan penderitaan untuk mendisiplinkan kita dan berjanji kepada Ayub bahawa Tuhan akan memulihkan dia jika dia menerima didikan-Nya.

Pendapat Elifas itu bagus dan, secara amnya, benar. Penderitaan mungkin menjadi seruan kepada kita untuk bermuhasabah dan memastikan sama ada kita melakukan apa-apa yang salah. Namun, bagi Ayub, nasihat ini tidak tepat. Ayub tidak pernah melakukan apa-apa yang salah untuk menerima malapetaka yang ditimpa dia. Sekarang, selain kesengsaraan dan penderitaan dahsyat yang sedang dialami Ayub, dia perlu berhadapan dengan tuduhan palsu ini!

Apabila kita memberi tumpuan kepada Yesus sepanjang musim Pra-Paskah ini, kita mengingati bahawa Dia merupakan penderita benar yang tiada bandingan. Dia jauh mengatasi Ayub kerana Dia tidak berdosa. Namun, Dia turut menderita dengan dahsyat—bukan atas disiplin tetapi untuk membayar hukuman dosa-dosa kita. Betapa hebatnya Penyelamat ini! Jadi, walaupun kita menanggung penderitaan yang tidak sepatutnya, mari kita menguatkan hati kerana Yesus telah mendahului kita dan menderita bersama kita.



*Apakah penderitaan yang pernah kita alami?
Adakah penderitaan itu atas disiplin Tuhan?
Jika ya, apakah reaksi atau sahut balas kita?
Dan jika tidak, apakah kesan penderitaan itu
terhadap diri kita dan hubungan kita dengan Tuhan?*

Ya Bapa, apabila aku menghadapi disiplin-Mu, bantu lah aku untuk menerima nya dan bertaubat. Dan jika aku perlu menanggung penderitaan yang tidak sepatutnya, berikan aku kekuatan dan ketabahan untuk tetap setia pada Mu. Amin.





Tiga Aspek Kebijaksanaan

Bacaan Alkitab: Amsal 30:1-9

*“Aku tidak mempelajari hikmah, dan aku tidak mempunyai pengetahuan tentang Yang Maha Suci.”
(Amsal 30:3; AVB)*

Dalam sembilan ayat ini, kita mendapati tiga aspek kebijaksanaan—bukan setakat pengetahuan atau kepintaran, tetapi cara menjalani hidup yang baik; kebijaksanaan yang bermula dengan ketakutan kepada Tuhan (Amsal 9:10).

Yang pertama adalah kebijaksanaan untuk mengaku dengan rendah diri bahawa kita kekurangan kebijaksanaan (30:2-3). Tindakan ini adalah asas kerana apabila kita dengan bongkak memikirkan bahawa kita sememangnya bijaksana, maka kita tidak akan berusaha untuk mengenali Allah dan memperoleh kebijaksanaan yang benar. Agur menegaskan perkara ini dengan mengemukakan satu siri soalan retorik berkenaan perkara-perkara yang hanya dapat dilakukan dan diketahui Allah (30:4), berakhir dengan sindiran, *“Engkau pasti tahu!”*

Yang kedua adalah kebijaksanaan untuk menyanjung Firman Tuhan. Setelah kita sedar bahawa kita perlu mengenali Allah dan belajar daripada Nya, kita perlu kembali kepada Kitab Suci, di mana perwatakan-Nya dan sifat-Nya didedahkan. Kita perlu menganggap Firman Tuhan sempurna dan tidak harus menokok tambah (30:5-6).

Yang ketiga adalah kebijaksanaan untuk mengingini sesuatu dalam kadar secukupnya. Sebaik sahaja kita mengenali Tuhan, kita perlu memelihara hubungan kita dengan Nya hanya menerusi pencarian *“makanan secukupnya”* (30:8c). Kita perlu mengelak perangkap berkembar iaitu pujaan kekayaan dan perangkap kemiskinan; kedua-dua boleh menyebabkan kita menyangkal dan memfitnah nama Tuhan.




Bagaimanakah kita dapat menyemai sikap mencari dengan rendah hati bagi mengenali Tuhan? Adakah kita memberikan keutamaan yang sepatutnya pada Kitab Suci? Bolehkah kita secara jujur memohon Tuhan hanya untuk ‘makanan secukupnya’?

Ya Bapa, maafkan aku kerana terlalu bongkak menganggap diri-ku bijak. Bantu aku untuk merendahkan hati dalam mencari Mu dan hikmah-Mu, untuk menyanjung Firman-Mu, dan tidak mengingini lebih daripada yang aku perlukan. Amin.

Janji-Janji Allah Dan Sahut Balas Kita

Bacaan Alkitab: Kejadian 15:1-6, 12-18



Lalu Abram percaya kepada TUHAN dan TUHAN memperhitungkan hal itu baginya sebagai perbenaran. (Kejadian 15:6; AVB)

Di sini, Allah menunjukkan diri-Nya kepada Abram semata-mata untuk meyakinkan dia bahawa Allah sendiri merupakan pelindung-nya dan ganjaran-nya yang muktamad (15:1). Sudah pasti kita juga pernah menerima kehadiran Tuhan dan jaminan janji-janji-Nya yang berharga, terutamanya sewaktu kita benar-benar memerlukan Nya.

Walau bagaimanapun, Abram bertindak dengan penuh persoalan dan kesangsian (15:2-3). Abram sudah lanjut usia, namun masih tidak mempunyai anak. Hamba-nya akan menjadi waris-nya. Sudah pasti kita juga pernah sekali-sekala mempersoal Tuhan dan berasa sangsi terhadap Firman-Nya.

Walau demikian, Allah berfirman: Abram akan mempunyai seorang anak laki-laki dan keturunan yang banyak (15:4-5). Dengan itu, Tuhan memperbaharui janji-Nya untuk menjadikan Abram suatu “*bangsa yang besar*” (12:2). Kali ini, Abram bertindak dengan penuh kepercayaan—kepercayaan yang wajar di hadapan Tuhan. Sudah pasti kita juga sedang belajar untuk menyahut balas Tuhan dengan iman yang sama sepanjang kita menjalani hidup ini bersama-Nya.



Renung semula saat-saat Tuhan meyakinkan kita dan bersyukur lah. Apakah kesangsian kita sekarang? Bentangkan kesangsian-kesangsian ini kepada Tuhan. Adakah kita menyahut balas Tuhan dengan penuh iman dan memperbaharui janji-janji kita dengan Nya?

Ya Bapa, terima kasih di atas waktu-waktu yang Engkau telah menggalakkan dan meyakinkan aku. Apabila aku dibelenggu kesangsian dan persoalan, teguhkan iman-ku dalam Mu dan Firman-Mu. Amin.

Tidak Terlampau Ke Hadapan Ataupun Ketinggalan

Bacaan Alkitab: Kejadian 16:1-6

Lalu Sarai isteri Abram membawa Hagar, warga Mesir yang menjadi hambanya itu, dan memberikannya kepada Abram suaminya untuk menjadi isterinya. Pada waktu itu sudah sepuluh tahun lamanya Abram tinggal di Tanah Kanaan. (Kejadian 16:3; AVB)



Seperti yang terlafaz dalam nyanyian lagu Sekolah Minggu, kehidupan Kristian bererti 'berjalan bersama Yesus'. Namun begitu, dalam perjalanan selari dengan Tuhan, kadang-kadang kita ketinggalan. Kita enggan mengikut dan mula mengheret kaki dengan pelbagai alasan. Pada waktu yang lain, kita mungkin meluru terlampau ke hadapan dan meninggalkan Nya. Kita cuba memanipulasikan situasi dan merancang untuk melakukan kerja tanpa bertindak mengikut pimpinan dan waktu Tuhan. Petikan hari ini merupakan contoh yang terkemudian.

Dalam renungan dan bacaan semalam, Abram menerima perjanjian yang diperbaharui oleh Allah—iaitu keturunan-nya akan sebanyak bintang di angkasa (15:5). Namun begitu, Abram dan Sarai masih tidak mempunyai anak untuk sekian lama dan harapan mereka semakin tipis. Lantas Sarai mendapat ilham 'bijak' untuk memperoleh waris melalui hamba perempuan-nya—Hagar.

Apabila sesuatu disalahgunakan daripada cara yang sepatutnya, masalah pasti timbul. Allah merancang perkahwinan yang sempurna di mana seorang teruna dan seorang dara disatukan dengan komitmen di antara mereka berdua untuk seumur hidup (2:23-24). Mengundang Hagar untuk memasuki perkahwinan Abram dan Sarai merosakkan rancangan Allah. Lantas, kesan negatif tercetus. Perhubungan terputus: Hagar menghina Sarai yang mandul, Sarai menuduh Abram walaupun cadangan itu berasal dari diri-nya, Abram membenarkan Sarai menindas Hagar, dan akhirnya Hagar melarikan diri.



Adakah kita meluru terlampau ke hadapan sehingga meninggalkan Yesus? Ataupun kita ketinggalan? Apakah yang telah terjadi? Adakah sekarang kita akan bertekad untuk menyangkal diri, memikul salib setiap hari, dan mengikuti Yesus (Lukas 9:23)?

Ya Bapa, maafkan aku sewaktu aku enggan menurut Firman-Mu. Maafkan aku sewaktu aku bertindak secara sendirian dan memandai-mandai. Bantu aku untuk mengikutimu Mu dengan lebih rapat dalam perjalanan seterusnya.

Dia Yang Mendengar Dan Melihat

Bacaan Alkitab: Kejadian 16:7-15

Lalu Hagar menyebut nama TUHAN yang berfirman kepadanya itu “Engkaulah Allah Yang Melihat,” kerana katanya, “Sesungguhnya, aku nampak Dia yang melihat aku.” (Kejadian 16:13; AVB)

Berdasarkan sistem patriarki pada waktu itu, Hagar berada dalam keadaan yang tidak memihak kepada diri-nya sebagai seorang wanita, seorang asing, dan seorang hamba. Dia juga tidak sempurna. Namun dia ‘memandang rendah’ kepada Sarai (barangkali dengan tidak menghormati dia) dan ini menyebabkan Sarai bertindak untuk ‘menindas’ dia (samada dengan menganiaya atau mendera). Lalu Hagar melarikan diri. Sehelai sepinggang dan tanpa arah tuju, Hagar bertemu dengan Allah.

Dalam ayat ke-10, Allah berjanji kepada Hagar untuk “*membuat keturunanmu menjadi tersangat ramai hingga tidak terhitung banyaknya,*” walaupun dia hanya mengandung pada waktu itu. Ini bukan hanya suatu janji berkat keturunan; ini juga merupakan jaminan segera untuk keadaan-nya. Hal ini menyebabkan Hagar menyahut balas dengan menamakan anak yang belum dilahirkan dan tempat dia bertemu dengan Allah sebagai ‘Allah mendengar’ dan ‘Allah melihat’.

Ini merupakan pengalaman Hagar—walaupun dia tergolong dalam komuniti berstatus paling rendah dan kehilangan arah tuju, Allah melihat dia dan mendengar dia. Pertemuan dia dengan Allah membuat dia mematuhi Allah dengan penuh iman sehingga dia sanggup pulang ke tuan-nya, Sarai, dan mematuhi nya—walaupun itulah situasi yang menyebabkan dia melarikan diri pada mulanya. Dia meletakkan kepercayaan-nya dalam Allah untuk situasi yang sedang dihadapi oleh dia.



Adakah kita sedang cuba sedaya upaya untuk melarikan diri dari sesuatu keadaan? Bagaimanakah kepercayaan kita dalam Allah yang melihat dan mendengar dapat membantu kita menempuh atau mengatasi keadaan itu?

Ya Allah yang mengetahui segalanya, Engkau memang jauh lebih besar daripada apa yang aku hadapi. Bantu lah aku agar lebih mengenali Engkau semoga kepercayaan aku dalam Mu dapat diperkukuhkan. Dalam nama Yesus, aku berdoa. Amin.




Ahad Kedua dalam Pra-Paskah

Berjalan Bersama Allah Menerusi Setiap Musim

Bacaan Alkitab: Kejadian 17:1-7, 15-16

"...hiduplah tanpa bercela di hadapan-Ku... Aku akan mengesahkan perjanjian-Ku antara Aku dengan kamu serta keturunanmu kelak, turun-temurun, menjadi suatu perjanjian yang kekal..." (Kejadian 17:1b, 7a; AVB)



Ketawa Atas Sebab-Sebab Yang Betul

Bacaan Alkitab: Kejadian 21:1-7

Sarah berkata, "Allah telah membuat aku tertawa. Setiap orang yang mendengarnya akan tertawa bersama-samaku." (Kejadian 21:6; AVB)

Pada mulanya Sarai tertawa memikirkan diri-nya tidak mungkin dapat mengandung pada usia tua (Kejadian 18:12-15). Akhirnya, dia tertawa atas sebab yang berlainan. Malah, anak-nya dinamakan Ishak yang bermaksud 'dia ketawa' untuk mengingatkan dia tentang kejadian itu.


Perjalanan seorang pemurid diduga ketidakpercayaan. Minda kita bukan sahaja bertarung dengan mukjizat dan kuasa ghaib. Membaca ajaran-ajaran Yesus dari Khutbah di atas Bukit membuat kita tergelak apabila memikirkan aksi memaling pipi terhadap musuh ataupun mengasihi musuh dalam dunia yang sudah pasti akan menyalahguna atau mengambil kesempatan ke atas sentimen-sentimen ini.

Namun, Allah yang membuka rahim seorang wanita berusia 90 tahun merupakan Allah sama yang menukar tawa ketidakpercayaan Sarai kepada tawa yang benar kerana Dia telah menunaikan janji-Nya. Allah ini yang mempertahankan sebuah negara di mana bandar-bandar-nya dimusnahkan dan penduduk-penduduk-nya bertempiran. Allah ini yang menebus dosa manusia dengan mengorbankan satu-satu anak-Nya di atas salib dan membangkitkan Nya tiga hari kemudian. Inilah Allah yang kita ikuti.



Asas iman kita membina jambatan antara janji Allah dan realiti kita. Bagaimanakah janji-janji Dia (contohnya, senantiasa menyediakan jalan keluar daripada godaan) diuji menerusi cabaran-cabaran yang kita hadapi?

Tuhan, aku sering buta walaupun aku mempunyai mata. Setiap hari, sambil aku menyaksikan pelaksanaan janji-janji-Mu, kuatkan iman-ku. Terima kasih, ya Tuhan. Amin.



Iman Yang Tidak Dimengerti

Bacaan Alkitab: Kejadian 22:1-19

Maka kata Abraham kepada hamba-hambanya, "Tinggallah di sini dengan keldai ini. Aku dan anak ini hendak pergi ke sana. Kami akan beribadat dan kemudian akan kembali lagi kepadamu." (Kejadian 22:5; AVB)

Apa yang tercatat dalam petikan ini sungguh menarik, dan yang sama menarik ialah apa yang tidak dicatat. Reaksi Abraham kepada perintah Allah langsung tidak disebut. Kita tidak tahu postur-nya sepanjang perjalanan. Kita tidak ada gambaran air muka Ishak apabila dia diikat dan diletakkan di atas kayu pada mazbah. Sebagaimana kita kekurangan butiran terperinci, begitu juga Abraham semasa dia menurut perintah Tuhan.

Memulakan perjalanan sebelum mengetahui tempat tuju bukanlah perkara baharu bagi Abraham; Abraham pernah melalui pengalaman yang serupa ketika Tuhan memanggil dia berjulung kali. Namun, kali ini, Tuhan menyuruh dia untuk mengorbankan Ishak di mana melalui Ishak banyak keturunan dan negara akan diberkati (Kejadian 17:21). Perintah itu merupakan satu ujian—bukan untuk membuat Abraham gagal, tetapi untuk membuktikan kebenaran janji Allah. Perintah Abraham kepada hamba-hamba-nya untuk tunggu sehingga dia dan Ishak kembali kepada mereka merupakan penyataan iman yang dicatat penulis Ibrani: "*Abraham yakin bahawa Allah berkuasa membangkitkan Ishak daripada kematian. Oleh itu boleh dikatakan, Abraham sudah menerima Ishak kembali dari kematian.*" (Ibrani 11:19; BM)



Perintah Allah untuk menurut kata tidak selalu didahulukan dengan pemahaman atau persetujuan. Adakah kita bersedia untuk mematuhi Allah berdasarkan iman dalam Dia dan hanya Dia?

Ya Tuhan, Engkau tetap baik, benar, dan mengasihi. Bebaskan aku daripada kebelengguan hasrat diri dan segala jangkauan yang aku harapkan daripada Mu. Dalam nama Yesus aku berdoa. Amin.



Pengharapan Yang Benar

Bacaan Alkitab: Yeremia 30:12-22

“Kamu akan menjadi umat-Ku dan Aku akan menjadi Allahmu.” (Yeremia 30:22; AVB)

Orang Israel menyaksikan kebenaran janji-janji Allah, termasuk kesan-kesan negatif seperti kekalahan mereka di mana mereka dijadikan orang buangan. Kini, sebuah janji yang lain dibuat untuk memulihkan mereka—bukan sekadar sebagai sebuah bangsa tetapi juga sebagai umat-Nya. Sebagai saksi kepada kebenaran janji-janji Allah, pengharapan dinyalakan semula.

Pengharapan merupakan sesuatu yang amat penting bagi kita semasa menjalani hidup di dalam dunia yang tidak sempurna. Pengharapan mendorong kita untuk melihat melangkaui masalah yang dihadapi sekarang ke arah rehat yang menanti—di mana derita dan sakit yang kita hadapi mempunyai tujuan dan bukan sekadar sesuatu yang tidak bererti. Pengharapan menguatkan jiwa kita sementara merindui keabadian. Namun, pengharapan tiada di mana-mana kecuali di dalam janji-janji Allah yang tidak pernah gagal kerana hanya Allah yang boleh mengubah kesusahan menjadi rehat; hanya Allah yang memberi tujuan kepada penderitaan; hanya Allah yang membentuk keabadian. Pengharapan yang benar dilahir dan dipenuhi dalam Allah sahaja.

Maka, betapa menakjubkan yang pengharapan kita terletak pada Allah yang baik yang menyembuhkan luka-luka kita dan memulihkan kita daripada keruntuhan dan semangat putus asa. Betapa indahnya Yesus yang memberi kita pengharapan bukan sahaja sebagai umat-Nya di dunia ini, malah buat selama-lamanya.



Jika situasi peribadi ataupun duniawi telah menyebabkan kita ingin berputus asa, bagaimana tangan Allah yang penuh kuasa membawa pengharapan kepada situasi-situasi itu?

Allah Bapa yang Maha Kuasa, baik, dan penuh kasih, ajari aku untuk melangkaui keluar daripada pemikiran dan keinginan diri supaya hati-ku terpaut pada Mu dalam pengharapan yang pasti dan tentu. Amin.



Dipanggil Untuk Menaati

Bacaan Alkitab: Keluaran 19:1-9a

“Sekarang, jika kamu sungguh-sungguh mematuhi-Ku dan taat memegang perjanjian-Ku dengan teguh, maka kamu akan menjadi harta-Ku yang istimewa antara segala bangsa...” (Keluaran 19:5a; AVB)

Selepas keluar dari Tanah Mesir, orang Israel tiba di Gunung Sinai. Perjalanan mereka jauh dan susah tetapi disertai oleh tangan Allah yang bekerja untuk mereka yang membuatkan hati mereka menjadi bertambah kagum dengan kehebatan-Nya. Mereka menyaksikan dengan mata sendiri bagaimana Tuhan membebaskan mereka daripada penghambaan. Sekarang, Tuhan ingin bersemuka dengan mereka untuk mengutuskan hasrat-Nya sebagai bangsa terpilih-Nya.

Orang Israel dipelawa untuk menjadi milik kesayangan Allah. Mereka diberi keistimewaan untuk membuat perjanjian dengan Allah dan mentaati Nya. Atas ketaatan mereka, Tuhan akan mengurniakan penghormatan kepada Israel sebagai milik-Nya yang disayangi, kerajaan para iman, dan bangsa yang suci.

Seruan untuk ketaatan begitu bermakna bagi kita memandangkan kerja Kristus telah selesai di salib. Kesedaran atas segala yang telah dilalui oleh Yesus seharusnya menimbulkan rasa kesyukuran dan pemujaan dalam hati kita buat Dia yang taat walaupun bersemuka dengan kematian! Tidak hairanlah Bapa berkenan dengan Anak-Nya (Markus 1:11)! Allah berkenan dengan ketaatan dan ketaatan jauh mengatasi pengorbanan (1 Samuel 15:22).



Apakah tahap ketaatan kita dalam barometer kehidupan? Adakah tahap itu menyenangkan Tuhan?

Ya Bapa, aku sering melanggar perintah-Mu kerana mengikut kehendak sendiri. Pimpini aku agar dapat mentaati dan menyenangkan hati-Mu seperti yang dilakukan oleh Yesus. Semoga aku menjadi milik-Mu yang istimewa. Amin.

Dipanggil Untuk Kesucian

Bacaan Alkitab: Keluaran 19:9b-15

Firman TUHAN kepada Musa, “Pergilah kepada umat itu. Sucikanlah mereka pada hari ini dan esok. Mereka harus mencuci pakaian mereka...” (Keluaran 19:10; AVB)

Memasuki hadirat Allah merupakan perkara yang serius dan tidak boleh dianggap remeh. Selepas orang Israel diseru untuk mentaati Allah, Dia memberi garis panduan agar mereka bersiap sedia untuk bertemu dengan Dia. Di sini, Tuhan menguji ketaatan orang Israel dalam mematuhi dan mengikuti peraturan dan batasan yang ditentukan oleh Dia. Dosa tidak diterima sama sekali dalam hadirat suci Allah.

Allah bakal menampilkan diri untuk memberi Sepuluh Perintah dan peraturan-peraturan lain kepada Israel. Sebelum ini berlaku, orang Israel perlu menyucikan diri dan berada di dalam lingkungan yang ditentukan oleh Tuhan supaya **mereka boleh hidup!** Dunia menganggap lingkungan dan peraturan itu sesuatu yang membencanakan, tetapi Tuhan menetapkan lingkungan dan peraturan untuk melindungi kita.

Mazmur 24:3-4 menyatakan bahawa hanya mereka yang bertangan bersih dan berhati mulia boleh menaiki bukit ALLAH dan berdiri di tempat suci-Nya. Paulus menyeru umat Tuhan untuk mengerjakan penyelamatan mereka dengan penuh takut dan gementar (Filipi 2:12). Petrus mengingatkan umat Tuhan untuk menguduskan diri sebagaimana Allah adalah kudus (1 Petrus 1:15-16). Kita melakukan semua ini dengan penuh kagum dan hormat kepada keagungan dan kesucian Allah sementara kita mentaati Dia dengan sepenuh hati. Ini merupakan sikap yang sesuai terhadap manifestasi Allah kepada kita —sama ada menerusi gambaran yang hebat mahupun menerusi bayi di dalam palungan.



Apakah perkara atau perihal yang perlu kita singkirkan untuk mencapai kesucian?

Ya Bapa, biar lah aku menjalani sepanjang hidup ini *coram Deo* (dalam hadirat-Mu). Amin.





Saksi Allah

Bacaan Alkitab: Keluaran 19:16-25

Semakin lama, bunyi sangkakala itu semakin kuat. Lalu berbicaralah Musa, dan Allah menjawab dia dengan suara seperti guruh. (Keluaran 19:19; AVB)

Penampilan Allah di Gunung Sinai membuat Israel menggeletar. Mereka telah menyaksikan tanda-tanda dan keajaiban Allah dalam sepuluh wabak, tiang awan dan tiang api dalam perjalanan mereka, dan Laut Merah yang terbelah. Namun, tiada yang menyediakan mereka untuk perkara yang bakal mereka alami: Hadirat Allah itu sendiri.

Pengalaman ini kemungkinan besar menjadi kesaksian Tuhan berkenaan Musa. Keluaran 19:9 (AVB) mencatat: *“Sesungguhnya, Aku akan datang kepadamu dalam awan yang tebal, supaya bangsa itu dapat mendengar apabila Aku berfirman kepadamu, dan supaya mereka akan sentiasa percaya kepadamu.”* Tuhan memberi umat-Nya pengalaman ini agar mereka boleh percaya kepada hamba-Nya Musa untuk menyampaikan Firman-Nya.

Begitu juga, kita melihat Hadirat Allah mengurapi Petrus, Yohanes, dan Yakobus di gunung tempat Yesus berubah rupa. Tujuan Tuhan adalah untuk menjadi saksi kepada Anak-Nya. Lukas 9:34-35 (AVB) berfirman: *Ketika Petrus berkata demikian, suatu awan meliputi mereka dan mereka ketakutan. Lalu kedengaran suara dari dalam awan itu mengatakan, “Inilah Anak-Ku yang Kupilih. Dengarlah kata-kata-Nya!”* Tidak ada lagi kesaksian yang lebih baik daripada Allah menjadi saksi berkenaan Anak-Nya.



Adakah kita sanggup untuk meletakkan kepercayaan sepenuhnya hanya pada Kristus dan Firman-Nya?

Ya Bapa, ajari aku untuk mendengar kata-kata-Mu dan mentaati Mu sepenuh hati. Amin.

Ahad Ketiga dalam Pra-Paskah

Perlindungan Dalam Taurat

Bacaan Alkitab: Keluaran 20:1-17

“Akulah TUHAN, Allahmu... Jangan ada padamu tuhan-tuhan lain selain Aku...
Jangan... Jangan... Ingatlah... Hormatilah... Jangan...” (Keluaran 20:2a, 3dst; AVB)





Menanti Pengabulan

Bacaan Alkitab: 1 Raja-Raja 6:1-4, 21-22

Pada tahun keempat ratus lapan puluh setelah orang Israel keluar dari Tanah Mesir, tahun keempat pemerintahan Salomo atas orang Israel, Salomo memulai pembinaan Bait TUHAN... (1 Raja-Raja 6:1; AVB)

Kita hidup dalam dunia yang serba pantas dan berorientasikan aksi dan tindakan. Penggunaan alat elektronik juga mengubah cara kita berfikir dan melakukan sesuatu; pengambilan keputusan perlu dibuat dengan pantas. Orang moden mempunyai masalah dengan konsep menunggu.

Orang Israel menunggu selama 480 tahun untuk membina Bait Suci. Keluaran dan pembinaan Bait Suci adalah dua peristiwa penting dalam sejarah Yahudi. Banyak undang-undang yang diberi melalui Musa adalah mengenai kehidupan masyarakat yang berkait dengan Bait Suci. Mengapa pula mereka harus menunggu begitu lama untuk membina Bait Allah sedangkan Bait ini dijanjikan jauh lebih awal oleh Tuhan? (Ulangan 12:5)

Renungan ini mengingatkan kita bahawa Tuhan mempunyai waktu dan cara tersendiri untuk melaksanakan tujuan-Nya. Jika kita melakukan pekerjaan Tuhan, ianya harus dilaksanakan dengan cara-Nya pada waktu-Nya. Waktu penantian adalah waktu di mana hati dan fikiran dipersiapkan—di mana sikap dan kehendak kita diorientasikan semula kepada agenda Tuhan. Status tidak aktif tidak bermaksud Tuhan tidak melakukan apa-apa. Apabila tiba waktunya, kita mesti bersedia untuk beraksi dan menjalankan tugas.



Adakah kita merasa letih menunggu Tuhan bertindak? Apakah yang boleh kita lakukan untuk terus mara ke hadapan?

Bapa, bantu aku untuk menunggu, untuk mengetahui yang Engkau bertakhta. Persiapkan aku supaya aku sedia dan rela melakukan pekerjaan itu apabila waktunya tiba. Amin.

Tanggungjawab Yang Hebat

Bacaan Alkitab: 2 Tawarikh 29:1-11, 16-19

Pada bulan pertama dalam tahun pertama pemerintahannya, Hizkia membuka pintu-pintu Bait TUHAN dan memperbaikinya. (2 Tawarikh 29:3; AVB)



Pemimpin adalah orang penting. Dalam fasal 28 dan 29, kita melihat dua pemimpin dengan kecenderungan yang berlawanan. Ahas “menutup pintu-pintu Rumah TUHAN”; dia menodai barang-barang rumah Allah dan mendirikan mazbah asing “di segenap penjuru Yerusalem” (28:24; AVB). Sebagai hasil dosa dan perbuatan-nya, Allah menimpakan hukuman ke atas umat Yehuda.

Sebaliknya, Hizkia membuka pintu-pintu Rumah TUHAN dan memerintahkan para imam untuk membersihkan Bait Suci, iaitu untuk “Keluarkanlah segala hal yang cemar daripada Tempat Suci.” Baik Israel dan Yehuda mendapat manfaat dari tekad hati-nya “untuk mengikat perjanjian dengan TUHAN”. Hasil daripada pembaharuan yang banyak dilakukan oleh Hizkia, Tuhan memulihkan tanah itu.

Hari ini, kita adalah bait Allah (1 Korintus 3:16). Kita boleh membuka atau menutup pintu hati kita kepada suara-Nya. Adakah kita akan melakukan permintaan-Nya? Ini adalah tanggungjawab yang hebat! Keputusan dan tindakan yang salah boleh memberi kesan kepada orang yang kita sayangi dan orang lain di sekeliling kita; akhirnya, ini turut memberi kesan yang buruk kepada negara kita secara keseluruhan.



Adakah pintu hati kita terbuka kepada Roh Kudus? Adakah kita akan menjadi alat kebenaran-Nya demi negara yang kita cintai?

Bapa, aku berdoa agar kita membuka hati kita kepada Mu. Suluh lah terang-Mu menerusi kita supaya kehendak dan rencana-Mu yang baik akan dilaksanakan di tanah kita. Amin.

Sukacita Dari Tuhan

Bacaan Alkitab: Ezra 6:1-16

Kemudian orang Israel... merayakan perasmian Rumah Allah itu dengan gembira. (Ezra 6:16; AVB)

Akhirnya Bait Suci selesai dibina—disiapkan dengan kos yang tinggi dan pengorbanan yang besar, kerja keras dan tangisan, penolakan diri dan kesusahan. Orang Israel berkumpul untuk merayakan dedikasi Rumah Allah dengan gembira, syukur dan sukacita. Mereka bersukacita kerana TUHAN telah memenuhi mereka dengan sukacita; Dia “telah membuat mereka bersukacita...” (Ezra 6:22; AVB).

Seperti umat Israel, kita mendapat sukacita dalam mengetahui yang Allah sentiasa menyediakan segala keperluan kita, sukacita dalam melayani Dia di mana sahaja Dia menempatkan kita, dan sukacita dalam penyembahan bersama. Kita dapat merasakan sukacita yang datang apabila kita duduk di hadirat-Nya dan dalam menjalani kehidupan suci dengan mematuhi kehendak-Nya.

Tuhan sendiri adalah sumber sukacita kita. Hadirat-Nya menggembirakan kita (Mazmur 16:11; BM) dan kita akan masuk dan bersukacita bersama Tuhan suatu hari nanti (Matius 25:21; BM). Nehemia 8:10 (AVB) memberitahu kita, “*sukacita daripada TUHAN adalah kekuatan kamu.*” Sukacita Tuhan memberi kita kekuatan untuk meneruskan perlumbaan tanpa goyah, terus berjalan ketika kita ingin menyerah, dan meraih cinta-Nya walaupun kita merasa Dia tiada bersama kita. Mari lah kita bersukacita bersama Nya, Tuhan dan Penyelamat kita!



Adakah kita ingin mengejar sukacita dari Tuhan dengan sepenuh hati? Maka, apakah kita harus mengasihi dan mentaati Dia supaya sukacita-Nya ada dalam diri kita?

Tuhan, jadikan aku sentiasa bergirang. Semoga Engkau terus menjadi sumber sukacita-ku, dan semoga sukacita-Mu menerangi hati dan kehidupan orang di sekeliling aku. Amin.

Pelangi Tuhan Di Dalam Awan

Bacaan Alkitab: Kejadian 9:8-17

“Apabila muncul pelangi di awang-awangan, maka Aku akan melihatnya dan mengingati perjanjian abadi antara Allah dengan segala jenis hidupan yang ada di bumi.” (Kejadian 9:16; AVB)

Perhatikan apa yang Tuhan katakan kepada Nuh dan keluarga-nya: *“Apabila muncul pelangi di awang-awangan, maka Aku akan melihatnya dan mengingati perjanjian abadi...”* Tuhan tidak berkata, “Ketika pelangi muncul, kamu akan ingat...” Sekali lagi, bersama Israel di Mesir, Tuhan berfirman, *“Apabila Aku melihat darah itu, maka Aku akan melalui kamu...”* (Keluaran 12:13; AVB), dan tidak, “Apabila kamu melihat darah itu, Aku akan melalui kamu.”

Tuhan yang ingat akan kita! Syukur kepada Tuhan bahawa peringatan kepada perjanjian tidak diserahkan kepada kita kerana ingatan kita lemah. Syukur kepada Tuhan bahawa jaminan dan keselamatan kita tidak bergantung kepada kita kerana kita boleh gagal. Semua ini terletak pada Tuhan. Kita hanya perlu melihat tanda pelangi di awan yang mengingatkan kita bahawa Tuhan ingat dan Dia tidak akan melupakan kita kerana kita terukir di telapak tangan-Nya.

Pelangi Tuhan ada di setiap awan kesulitan, kesedihan, dan kematian. Mari lah kita bersemangat kerana pelangi itu memberitahu kita bahawa Dia mengingati kita dan Dia memegang kita di tangan-Nya yang penyayang.



Adakah kita tawar hati? Tertekan? Angkat mata kita dan cari pelangi di awan, dan ingat lah bahawa Tuhan ingat.

Tuhan, tolong aku untuk melihat pelangi di sebalik awan setiap hari dan mengingati bahawa Engkau ingat. Biar aku hidup setiap hari dengan kepercayaan pada Firman-Mu dan kesetiaan-Mu. Amin.





Pengharapan Kita Yang Diberkati

Bacaan Alkitab: Daniel 12:5-13

“Engkau Daniel, harus setia sampai akhir. Engkau akan meninggal, tetapi engkau akan bangkit untuk menerima ganjaranmu pada akhir zaman.” (Daniel 12:13; BM)

“Engkau Daniel, harus setia sampai akhir.” Daniel tidak perlu risau atau putus asa dengan masa kini atau masa depan. Setahu dia, dia harus pergi dan mengikuti jalan yang Allah tetapkan untuk dia. Perjalanan-nya ditandai dengan mata yang hanya tertumpu kepada matlamat-nya. Begitu juga bagi kita. Jangan berputus asa, atau terpinggir, atau tawar hati, tetapi teruskan perlumbaan yang ditetapkan di hadapan kita. Maka kita akan dapat mengatakan bahawa kita telah berjuang dengan baik; kami telah menamatkan perlumbaan.

“Engkau Daniel, harus setia sampai akhir.” Perintah ini diikuti dengan janji: *“Engkau akan meninggal, tetapi engkau akan bangkit untuk menerima ganjaranmu pada akhir zaman.”* Kita dapat menantikan rehat kita, dan jika Tuhan kita tidak kembali selama kehidupan kita, kita berharap dapat menerima bahagian kita ketika kita bangkit dari kematian. Inilah harapan yang menjadi dasar kita untuk hidup yang soleh—pengharapan yang memberi inspirasi kepada kita untuk tidak menyerah, tetapi untuk mengakhiri perlumbaan yang ditetapkan di hadapan kita. Inilah pengharapan kebangkitan yang diberkati, kemuliaan surgawi, dan penampilan yang mulia dari Tuhan dan Penyelamat kita, Yesus Kristus.



“Aku akan segera datang!” kata Yesus. Adakah kita bersedia untuk menjawab: Amin! Datang lah, ya Tuhan Yesus!

Tuhan, izinkan diri ini menjalani hidup seharian dengan melihat kedatangan-Mu di awan. Benarkan pengharapan ini menyucikan hidup-ku agar aku tidak akan malu apabila Engkau datang. Amin.



Perhimpunan Bersama Leluhur

Bacaan Alkitab: Bilangan 20:22-29

Kemudian di Gunung Hor itu... TUHAN berfirman kepada Musa dan Harun, "Harun akan dikumpulkan bersama-sama kaum leluhurnya." (Bilangan 20:23-24a; AVB)

Ungkapan "*dikumpulkan bersama-sama kaum leluhurnya*" meyakinkan kita bahawa, walaupun Harun mati di padang belantara akibat dosa-nya di Meriba, dia tidak dikecualikan dari Tanah Perjanjian yang benar dan kekal. Harun dikumpulkan bersama leluhur-nya "sebagai orang yang mati dalam pelukan rahmat Ilahi" (Matthew Henry, *Commentary on the Whole Bible*). Musa, Harun, dan Eleazar mendaki gunung dengan keagungan yang sungguh-sungguh di depan seluruh kem untuk bertemu dengan TUHAN. Harun pergi dari Gunung Hor ke Gunung Sion yang kekal—sebuah ziarah iman yang menuju kepada kehidupan kekal.

Begitu juga bagi kita yang percaya. Akan ada saat-saat di mana kita akan tersandung dan jatuh, dan ada kalanya kita merasa ingin menyerah. Cubaan di padang gurun itu kuat dan berlipat ganda, tetapi kesudahannya dijanjikan dan terjamin ketika kita tetap bersama Tuhan. Apabila kita sampai ke akhir zaman kita, kita turut akan dikumpulkan bersama leluhur kita, umat Tuhan. Betapa indahnyanya hari itu!

Oleh itu, mari lah kita bertahan dengan kepastian pada kehadiran Tuhan bersama kita untuk membimbing, menghibur, dan menyediakan sehingga kita mencapai harta pusaka yang dijanjikan.



Setiap hari, adakah kita menantikan kedatangan hari Tuhan yang diberkati di mana kita akan berangkat dan bersama-sama dengan Kristus selama-lamanya?

Ya Tuhan, perkasakan aku untuk menjalani kehidupan ini dengan menantikan kedatangan-Mu agar aku memuliakan nama kudus-Mu. Amin.

Ahad Keempat dalam Pra-Paskah


Tumpukan Perhatian-mu Pada Nya!

Bacaan Alkitab: Bilangan 21:4-9

“Sesiapa pun yang dipagut oleh ular tadi akan tetap hidup kalau dia melihat arca ular itu.” (Bilangan 21:8b; AVB)



Maksud kamu...
selama ini, semua ini
saling berkait?



Jalan Belantara

Bacaan Alkitab: Keluaran 15:22-27

Di sanalah TUHAN memberikan ketetapan dan peraturan kepada mereka dan di sanalah Dia menguji mereka. (Keluaran 15:25c; AVB)

Padang belantara adalah tempat ujian yang dipilih oleh Tuhan. Dia memimpin umat-Nya ke sana untuk mengajar mereka hanya bergantung kepada Nya dan mempercayai Firman Tuhan sepenuhnya.

Apa yang berlaku di Mara adalah pengajaran objektif mengenai kepercayaan dan kepatuhan. Setelah tiga hari kehausan, orang Israel akhirnya menemui air, tetapi air itu sangat pahit sehingga tidak dapat diminum. Tuhan kemudian menunjukkan kepada Musa sebatang kayu dan menyuruh dia membuang kayu itu ke dalam air. Firman Tuhan kepada Musa menentang logik—bagaimana sebatang kayu dapat mengatasi kepahitan air? Begitu juga dengan Naaman—mana mungkin terjunan tujuh kali ke dalam Sungai Yordan menyembuhkan kusta? Namun, Musa patuh dan air itu menjadi manis dan sesuai diminum.

Musa mengikuti Tuhan atas firman-Nya; dia mendengar dan mematuhi. Hasilnya adalah penyembuhan dan kemanisan. Inilah ujian kepatuhan dan iman sederhana. Kita perlu mendengar dengan teliti kepada Tuhan dan melakukan apa yang betul di mata-Nya; kita perlu memperhatikan perintah-perintah-Nya dan mematuhi Nya. Mari lah kita mendengar Firman-Nya dan mematuhi Firman-Nya; mari lah kita belajar mempercayai dan mematuhi.



*Adakah kita sudah belajar untuk mempercayai dan mematuhi?
Adakah kita akan mendengar dan mematuhi?*

Tuhan, tolong lah aku berjalan dengan iman dan bukan hanya dengan melihat, maka dengan melakukannya, aku akan belajar mempercayai dan mentaati Mu. Amin.

Dalam Kemarahan-mu, Jangan Berdosa

Bacaan Alkitab: Bilangan 20:1-13

Kata Musa kepada mereka, “Dengarlah, hai orang derhaka! Apakah kami harus mengeluarkan air bagimu dari bukit batu ini?” Lalu Musa mengangkat tangannya dan memukul bukit batu itu dua kali dengan tongkatnya. (Bilangan 20:10b-11a; AVB)

Dalam Efesus 4:26 (AVB), Paulus memberitahu kita, “*Apabila kamu marah, janganlah sampai melakukan dosa.*” Dalam petikan ini, kita melihat, sayangnya, bagaimana Musa berdosa dalam kemarahan-nya terhadap orang Israel. Dia begitu marah dengan mereka kerana memberontak sekali lagi—lalu dia memukul batu itu dengan tongkat-nya dua kali, dan bukannya berkata kepada batu itu seperti yang diperintah oleh Tuhan. Tindakan-nya tidak menghormati Tuhan yang kudus. Dengan demikian, Tuhan tidak mengizinkan Musa masuk ke Tanah Perjanjian. Kemarahan Musa menyebabkan dia lupa pada perkara yang Tuhan ingin dia lakukan dan dia berdosa terhadap Tuhan.

Paulus tidak mengatakan bahawa kita tidak boleh marah, tetapi tindakan sahut balas kita akan menentukan sama ada kita berdosa terhadap Tuhan atau tidak. Kita tidak boleh meluluskan tindakan kita yang salah dengan berasaskan alasan rasional yang orang itu wajar menerima balasan sebegitu. Kita bertanggungjawab terhadap cara kita menyahut balas terhadap orang dan keadaan di sekeliling kita tanpa mengira kesan-nya terhadap kita.

Tuhan itu penuh dengan belas kasihan dan kasih kurnia, kuat sabar serta melimpah kasih-Nya (Mazmur 103:8). Ketika kita marah, kita perlu menghadap Dia terlebih dahulu dan meminta rahmat-Nya untuk menolong kita mengatasi kemarahan kita. Barulah kita, seperti Dia, dapat menyahut balas dengan kasih kurnia dan belas kasihan.

Hari

24

Selasa



Bagaimanakah kita menyahut balas apabila menghadapi situasi yang membuat kita marah? Fikirkan satu kejadian sebegini dan renungkan bagaimana Tuhan mungkin mahu kita menyahut balas dengan cara yang berbeza.

Bapa, ketika berhadapan dengan situasi atau orang yang membuat ku marah, dorong aku untuk mendekati Engkau terlebih dahulu dengan emosi-ku. Kurniakan rahmat kepada aku untuk menjadi seperti Engkau—lambat marah dan penuh kasih sayang. Amin.



Jangan Berputus Asa Dengan Pengharapan

Bacaan Alkitab: Yesaya 60:15-22

“Aku, TUHAN, akan segera mewujudkannya pada waktunya.” (Yesaya 60:22b; AVB)

Walaupun umat-Nya terus-menerus melakukan dosa dan kemurtadan, Tuhan selalu mengingati perjanjian-Nya dengan mereka. Berkali-kali, Dia menjangkau mereka. Janji-Nya selalu untuk menebus mereka dari situasi yang bermasalah dan memberi mereka pengharapan dan kehidupan. Peringatan Allah yang terus-menerus kepada umat-Nya ialah Dia adalah Penyelamat mereka, Yang Maha Kuasa, yang akan bertindak dalam waktu-Nya untuk melaksanakan semua perkara, bahkan perkara yang kelihatan mustahil.

Sering kali, ketika keadaan tidak berjalan dengan lancar seperti yang kita harapkan, kita hanya melihat apa yang ada di hadapan kita—masalah, tiada pengharapan, dan semangat putus asa—dan kita berkubang dalam rasa kasihan pada diri sendiri. Kadang-kadang kita dilumpuh oleh rasa bersalah ke atas apa yang telah kita lakukan. Pada waktu-waktu sebegini, kita perlu mengingatkan diri akan kasih dan kesetiaan Tuhan yang tiada henti.

Walau bagaimanapun situasi kita, janji-Nya adalah Dia akan selalu mengangkat kita dan memberi kehidupan dan pengharapan yang baharu kepada kita. Apa yang perlu kita lakukan adalah melihat, bukan di dalam atau di sekitar diri kita sendiri, tetapi memandangi Dia yang kita percaya. Saat kita menunggu Dia, Dia akan memulihkan kita pada waktu-Nya; itulah janji-Nya yang tidak pernah gagal.



Renung kembali peristiwa di mana Tuhan hadir untuk menolong kita dan memberi kehidupan dan pengharapan yang baharu. Luangkan masa untuk merenungkan kebaikan-Nya dan bersyukur kepadaNya atas kesetiaan-Nya yang penuh kasih.

Bapa, terima kasih atas kasih dan kesetiaan-Mu yang tiada henti. Terima kasih kerana sepanjang masa Engkau telah mengangkat aku, dan memberi harapan dan hidup baharu. Amin.



Mencari Rehat Dalam Tuhan

Bacaan Alkitab: Yesaya 30:15-18

“Dengan bertaubat dan bertenang, kamu akan diselamatkan. Dengan berdiam diri dan percaya, terdapatnya kekuatanmu.” Tetapi kamu tidak mahu! (Yesaya 30:15b; AVB)

Ketika kita membaca kitab Yesaya, kita akan melihat bahawa umat Tuhan selalu memberontak, mencuba kesabaran Tuhan, dan hanya berpaling kepada Nya ketika mereka tiada pilihan. Ketika mereka diancam oleh kerajaan Asyur yang kuat, orang-orang Yehuda memilih Mesir dan bukan Tuhan untuk menolong mereka melawan musuh mereka (30:1-3).

Tuhan menegur mereka kerana tidak berpaling kepada Dia untuk menyelamatkan mereka dari musuh mereka. Walaupun mereka menolak Nya, Tuhan masih menjangkau mereka. Dia ingin menunjukkan belas kasihan dan rahmat-Nya kepada mereka kerana Dia tahu akibat buruk yang akan menimpa mereka jika mereka meneruskan jalan pilihan sendiri.

Rancangan Tuhan untuk kita selalu untuk kesejahteraan kita, bukan malapetaka, tetapi untuk mengurniakan masa depan dan harapan kepada kita (Yeremia 29:11). Daripada mempercayai kemampuan atau sumber daya sendiri untuk menjalani kehidupan kita atau mengurus masalah kita, Tuhan mengajak kita untuk berpaling kepada Nya dan beristirahat di dalam Nya. Apabila kita mempercayai Tuhan untuk membimbing kita melalui badai kehidupan, kita dapat memperoleh damai sejahtera bahawa Tuhan yang menjaga dan semuanya akan baik-baik sahaja.



Siapakah yang mengurus hidup kita—kita atau Tuhan? Bagaimanakah kita menjalani kehidupan kita? Luangkan masa untuk merenung dan berbicara dengan Tuhan mengenainya.

Bapa Syurgawi, bantu aku untuk mengetahui bahawa aku hanya dapat menemui rehat dan kekuatan sejati ketika berpaling kepada Mu untuk memimpin dan membimbing aku dalam menjalani kehidupan ini. Amin.

Aroma Harum

Bacaan Alkitab: Keluaran 30:1-10

“Setiap pagi apabila Harun membersihkan pelita-pelita itu, dia hendaklah membakar dupa harum di atas mazbah itu... dan kerja mendupai itu hendaklah kamu lakukan secara berterusan di hadapan TUHAN, turun-temurun.” (Keluaran 30:7-8; AVB)

Dalam Kitab Suci, kemenyan sering dikaitkan dengan doa. Dalam Mazmur 141:2 (AVB), Daud berdoa, *“Biarlah doaku hadir di hadapan-Mu sebagai setanggi.”* Yohanes menulis bahawa 24 penatua di sekitar takhta syurgawi *“Masing-masing memegang sebuah kecapi dan sebuah batil emas berisi setanggi, iaitu segala doa orang salih”* (Wahyu 5:8; AVB). Sama seperti mazbah yang dikuduskan oleh darah korban penghapus dosa sehingga dupa dapat dibakar di atasnya, begitu juga kita telah dikuduskan oleh darah Kristus agar doa kita dimakbulkan Tuhan. Pengorbanan Yesus memastikan pencurahan hati kita, baik dalam penyembahan atau permintaan, dapat memasuki hadirat Tuhan dan naik sebagai persembahan yang harum, suci, dan menyenangkan Nya.

Setiap kali kita menganggap Tuhan berdiam ketika kita berseru kepada Nya, setiap kali kita melayan keraguan bahawa Tuhan menjauhkan diri dari mendengar seruan kita, atau setiap kali kita tertanya-tanya apa gunanya berdoa berulang kali kerana doa kita tidak terjawab, mari lah kita mengingat kembali kata-kata Yohanes dalam Wahyu 5:8—gambaran mulia doa-doa kita yang dikumpulkan dalam mangkuk emas, suci, dan berharga di hadapan hadirat Tuhan!



Pada pendapat kita, apakah perasaan Tuhan setiap kali kita berdoa kepada Nya? Mengetahui yang Tuhan menganggap doa kita sebagai persembahan yang harum, bagaimana pengetahuan ini mempengaruhi cara kita berdoa?

Bapa, terima kasih kerana Engkau mendengar semua doa kami dan melihatnya sebagai persembahan harum kepada Mu. Aku memuji dan menyembah Mu kerana cinta-Mu yang luar biasa bagi kami. Amin.





Pengharapan Dan Iman Di Waktu Kesukaran

Bacaan Alkitab: Habakuk 3:2-13

Ya TUHAN, aku telah mendengar khabar tentang Engkau, dan pekerjaan-Mu, ya TUHAN, sememangnya aku takuti. Hidupkanlah pekerjaan-Mu kembali dalam zaman kami, nyatakannya dalam tempoh kami... (Habakuk 3:2; AVB)

Bagaimana kita menyahut balas apabila melihat ketidakadilan, rasuah, atau keganasan yang berleluasa berlaku di sekeliling kita? Adakah kita berjuang untuk memahami mengapa Tuhan seolah-olah membiarkan kejahatan wujud dan tidak dihukum? Atau mungkinkah kita sudah tidak merasa apa-apa lagi dan bersikap acuh tak acuh atau mengasingkan diri daripada keadaan itu? Kita lebih mudah berputus asa atau kecewa memikirkan Tuhan tidak peduli dengan keadaan kita, lebih-lebih lagi apabila kelihatan seperti Dia tidak melakukan apa-apa.

Habakuk memberi teladan kepada kita untuk menyahut balas dengan betul dalam waktu-waktu sukar sebegini. Daripada berputus asa, dia mengemukakan keraguan, keluhan, dan pertanyaan-nya kepada Tuhan dengan jujur dan menunggu jawapan Tuhan dengan sabar. Ketika dia bergelut dengan Tuhan mengenai persoalan ini, dia mengimbas kembali dan mengingat semua perbuatan hebat yang telah Tuhan lakukan untuk mereka. Dia juga melihat keajaiban ciptaan yang menunjukkan kehadiran dan kekuatan Tuhan yang luar biasa. Demikian juga bagi kita, peringatan ini tidak hanya menjadi sumber harapan dan iman untuk menghadapi cabaran semasa, peringatan ini turut mengundang kita untuk berpaling kepada Tuhan dan mempercayai Dia untuk membawa kita melalui waktu-waktu sukar. Kita boleh meminta campur tangan Tuhan demi menyerlahkan diri-Nya dalam situasi kita.



Sebelum ini, bagaimanakah kita mengalami kehadiran dan kuasa Tuhan dalam hidup kita? Apakah masalah atau cabaran yang sedang dihadapi yang memerlukan campur tangan Tuhan?

Tuhan, aku kagum dan bersyukur atas semua yang telah Engkau lakukan sebelum ini. Dalam waktu yang mencabarkan ini, bantu aku lagi seperti yang Engkau telah lakukan sepanjang tahun-tahun yang lalu. Amin.



Ahad Kelima dalam Pra-Paskah

Mereka Semua Akan Mengenal Aku

Bacaan Alkitab: Yeremia 31:31-34

“Aku akan menjadi Allah mereka dan mereka akan menjadi umat-Ku... semuanya, daripada yang terkecil kepada yang terbesar, akan mengenal Aku...”
 (Yeremia 31:33c, 34b; AVB)





Menjadi Saksi-Saksi Allah

Bacaan Alkitab: Yesaya 43:8-13

*“Kamulah saksi-saksi... dan Akulah Allah.”
(Isaiah 43:12c; AVB)*

Bayangkan kita berada di bilik pembicaraan memanggil saksi-saksi untuk membela anak guam kita. Apakah kriteria atau ukuran untuk seorang saksi yang baik—beramanah, boleh dipercayai, jujur, bercakap benar, dan yang menyaksikan secara langsung peristiwa itu? Allah memanggil umat Israel untuk menjadi saksi-saksi-Nya di hadapan tuhan-tuhan bangsa asing untuk membuktikan bahawa hanya Dia adalah Allah—menerusi semua yang Dia lakukan dalam kehidupan mereka. Umat Israel dipilih untuk mengenal, percaya, dan memahami siapa Allah yang telah menunjukkan diri-Nya kepada mereka, menyelamatkan mereka, dan menyatakan kebenaran-Nya kepada mereka.

Dalam Kisah Para Rasul 1:8, Lukas melaporkan bahawa Yesus memetik Yesaya 43:10 (AVB), *“Kamulah para saksi-Ku,”* bila mengutus pemurid-pemurid-Nya untuk bersaksi—melalui kehidupan, kata-kata, dan perbuatan mereka—atas siapa diri-Nya. Demikian juga, kita yang telah benar-benar bertemu dengan Allah dalam kehidupan kita dan mengalami secara langsung kuasa Roh Kudus yang mengubah, dipanggil untuk menjadi saksi tentang siapa Allah. Kita bersaksi dengan berkongsi kisah pengalaman dan pengetahuan kita tentang Allah—satu-satunya Allah yang akan menyelamatkan. Kehidupan kita menjadi tiang tanda di mana orang lain boleh mengenal Allah.



Kita diberi penghormatan dan diamanahkan dengan tanggungjawab untuk menjadi saksi Allah. Bagaimanakah orang lain dapat melihat atau mengalami Allah menerusi kehidupan kita?

Tuhan, betapa mulianya kasih dan maruah yang Engkau telah kurniakan kepada aku sehingga menganggap aku layak menjadi saksi-Mu. Bantu aku untuk menjadi saksi yang setia melalui kehidupan, kata-kata, dan perbuatan-ku. Amin.

Penyembahan Kepada Allah Yang Segenap Hati

Bacaan Alkitab: Yesaya 44:1-8

Yang satu akan berkata, “Aku milik TUHAN” (Yesaya 44:5a; AVB)

Di hujung Yesaya 43, umat Israel ditegur kerana menggantikan penyerahan diri yang tulen dengan ritualisme. Mereka berfikir yang mereka boleh memanipulasi Allah supaya berpihak kepada mereka dengan bergantung kepada upacara keagamaan dan tradisi sementara masih mengekalkan hak milik dan kawalan terhadap hidup mereka sendiri.

Tuhan menjemput umat-Nya untuk menjalin perhubungan yang komited dengan Dia iaitu kehidupan yang diserahkan sepenuhnya kepada Dia. Pencurahan Roh Kudus ke dalam hidup kita bukan saja memberi penyegaran dan berkat rohani, tetapi juga mengenal pasti kita sebagai umat milik Allah dan membolehkan kita menjalankan hidup yang tunduk sepenuhnya kepada Tuan dan Tuhan kita.

Ada kalanya kita tergoda untuk menyimpan beberapa bahagian kehidupan kita daripada Tuhan—bahagian-bahagian yang kita masih mahu mengawal, misalnya pilihan pekerjaan, keputusan kewangan, atau pilihan perhubungan. Yakobus merujuk kepada kesetiaan mereka yang berbelah bahagi di antara Allah dan dunia sebagai munafik dan tidak berpendirian (Yakobus 1:8; 4:8; AVB). Setia kepada Tuhan bererti kita tidak boleh melaksanakan sebahagian kehidupan kita untuk Allah dan sebahagian lagi untuk diri kita, atau mengharapkan berkat Tuhan sementara mengejar apa yang ditawarkan dunia. Tuhan mahu penyembahan dan komitmen kita yang segenap hati.



Adakah kita menjalani kehidupan yang diserahkan sepenuhnya kepada Tuhan? Apakah yang mengganggu atau menggoda kita daripada menjalani kehidupan yang penuh komitmen kepada Tuhan dan menyembah Nya dengan segenap hati?

Roh Kudus, tolong jalani kerja transformasi dalam kehidupan-ku supaya aku boleh menjalani hidup yang berkomitmen kepada Allah dengan segenap hati. Amin.



Bukan Seperti Dahulu

Bacaan Alkitab: Hagai 2:1-9

“Namun begitu, kuatkanlah hatimu... kuatkanlah hatimu... kuatkanlah hatimu... berusahalah, kerana Aku menyertai kamu, demikianlah firman TUHAN alam semesta.” (Hagai 2:4; AVB)

Orang Israel yang pernah melalui zaman buangan berasa tawar hati apabila mereka membandingkan Bait Allah yang mereka sedang bina semula dengan Bait Allah sebelum ini yang penuh dengan keagungan. Mereka terkenang masa silam dan rindu untuk mengalami pengalaman yang sama. Namun, Tuhan berfirman menerusi Hagai, mencabar mereka untuk membangkitkan diri daripada rasa tawar hati, dan menyeru mereka untuk berhati terbuka terhadap kerja yang Dia sedang lakukan di kalangan mereka pada waktu kini—kerja yang berlainan daripada masa silam. Mereka diseru untuk menggunakan sumber-sumber hadirat Tuhan (yang memberi kekuatan untuk meneruskan kerja yang ditugaskan) dan tindakan Tuhan (yang menghapuskan ancaman ketakutan) dalam menuntut janji Tuhan kepada mereka untuk masa depan yang lebih agung.

Ada di antara kita yang rindu untuk mengalami ‘masa silam yang indah’ ketika kita menilai pengalaman-pengalaman rohani masa kini dan membandingkan nya dengan pengalaman masa dulu, lantas menjadi tidak berpuas hati dan kecewa. Sebagaimana Hagai menggesa orang Israel untuk melangkau batasan pengalaman silam, mungkin kita juga perlu berbuat demikian dan menjadi terbuka untuk mengalami Tuhan menerusi cara-cara baharu yang lebih sesuai dengan situasi masa kini. Tuhan mempelawa kita untuk mengalami Dia secara mendalam sementara kita bertumbuh dalam kematangan.



Apakah pengalaman-pengalaman masa silam yang menghalang kita daripada mempunyai hati terbuka kepada cara-cara baharu yang Tuhan sediakan untuk kita dalam musim hidup ini?

Tuhan, bantu aku untuk tidak berpaut kepada masa silam, tetapi bersikap terbuka untuk menemui cara-cara baharu yang sedang Engkau kerjakan di dalam dan menerusi diri-ku. Amin.



Mengenangkan Itu Yang Kristus Lakukan Untuk Kita

Bacaan Alkitab: Ulangan 16:1-8

Dengan demikian, engkau akan mengingat hari engkau keluar dari Tanah Mesir itu seumur hidupmu. (Ulangan 16:3c; AVB)

Ulangan 16:1-8 menumpukan perhatian kepada Perayaan Paskah dan Perayaan Roti Tidak Beragi (Keluaran 12:1-28; 13:1-16). Di antara perayaan-perayaan keagamaan, Hari Paskah dianggap paling penting kerana perayaan ini memperingati perlindungan Allah daripada malaikat maut dan seterusnya pembebasan dari Tanah Mesir. Musa memberi arahan yang teliti dan terperinci tentang bagaimana perayaan-perayaan ini harus diraikan supaya umat Allah memahami kepentingan setiap lambang dan perbuatan, dan tidak lupa akan siapa Allah dan identiti mereka sebagai umat-Nya.



“Walaupun surat Ibrani mengisytiharkan kalendar upacara dan perayaan Israel purba telah dibatalkan melalui pengorbanan Kristus” (Daniel I. Block, *Deuteronomy*), Kristus tidak menghapuskan Paskah, tetapi mengubahnya secara radikal. Kristus mempersembahkan Diri-Nya sebagai korban yang sempurna untuk dosa-dosa kita (Ibrani 9:13-15) dan melalui korban-Nya, maut dihindari dan kita ditebus. Kerja Yesus di salib mengurniakan kehidupan dan kebebasan kepada semua yang berharap kepada Nya untuk penyelamatan. Apabila kita meraikan Perjamuan Allah, baptisan, dan musim seperti Pra-Paskah, semoga kita mengingat kenyataan kerja Tuhan bagi kita dan menyahut balas kepada Dia dengan penuh syukur ke atas segala yang telah Dia lakukan untuk kita.



Bagaimanakah kita meraikan musim Pra-Paskah dengan cara yang bererti untuk memperingati apa yang Kristus telah lakukan untuk kita?

Tuhan, bantu aku untuk mengingat bagaimana Engkau menyelamatkan aku dari kegelapan dan membawa aku ke dalam cahaya-Mu yang gemilang. Terima kasih di atas pengorbanan Paskah yang sempurna yang ditemui dalam Yesus yang telah membebaskan ku. Amin.

Pengharapan Kemuliaan

Bacaan Alkitab: Yeremia 33:1-9

“Berserulah kepada-Ku, maka Aku akan menjawab engkau dan menyatakan kepadamu hal-hal yang besar dan tidak terselami, iaitu hal-hal yang tidak kauketahui.” (Yeremia 33:3; AVB)



Tahunnya adalah 588 S.M. dan Yehuda dikepung. Orang-orang Babel sedang mencerooboh kota Yerusalem, lantas mengakibatkan kematian dan kemusnahan. Dalam huru-hara itu, Yeremia duduk di pelataran istana, dipenjarakan oleh Raja Zedekia kerana bernubuat tentang malapetaka yang bakal menimpa Yehuda. Situasinya suram; harapan seperti lenyap.

Kemudian Tuhan berfirman. Pengarang kitab ini mengingatkan kita bahawa Firman ini datang daripada Dia *“yang menjadikan bumi... yang membentuk dan menegakkannya”*. Tuhan ini berdaulat atas keadaan yang paling suram sekalipun; Dia berjanji untuk mendengar dan menjawab. Janji ini diberikan kepada orang yang tidak layak dan tidak patut menerimanya. Namun, Allah berjanji bukan saja untuk mendengar seruan mereka, tetapi untuk membawa penyembuhan dan kesejahteraan. Frasa *“Aku akan”* yang diulangi empat kali di dalam ayat-ayat 6-9 menekankan kepastian buat kehendak dan inisiatif Tuhan dalam menunaikan janji-Nya.

Mengapakah Tuhan menunjukkan belas kasihan? Ayat 9 menyatakan tujuan Tuhan adalah kemuliaan-Nya sendiri. Beralaskan belas kasihan-Nya, segala bangsa *“akan takut dan gementar”*. *“Allah paling dimuliakan di dalam kita ketika kita paling puas di dalam Dia,”* kata John Piper (Desiring God). Tuhan yang sungguh menakjubkan ini bergembira dalam kelimpahan kita dan kemuliaan-Nya ditunjuk dengan jelas melalui kasih kekal-Nya untuk umat-Nya!



Bagaimanakah kepastian masa depan yang mulia bersama Tuhan membantu kita menghadapi cabaran-cabaran kini? Fikirkan cara praktikal untuk hidup setiap hari atas belas kasihan Tuhan.

Ya Bapa, terima kasih di atas belas kasihan-Mu, Engkau menyelamatkan aku dengan kasih kurnia melalui iman. Bantu lah aku untuk merujuk pada Mu untuk pengharapan pada waktu-waktu suram dan untuk mencari kerajaan-Mu setiap hari. Amin.

Kasih Kekal Melalui Tunas Yang Benar

Bacaan Alkitab: Yeremia 33:10-16

“Pada waktu itu dan pada saat itu, Aku akan menumbuhkan Tunas yang benar bagi Daud...” (Yeremia 33:15a; AVB)

Tempat yang tandus, sunyi, dan tidak didiami; tempat yang girang, penuh kesyukuran, dan merehatkan—adalah tak terbayang bahawa kedua-dua gambaran merujuk kepada Yehuda. Namun, demikianlah janji Tuhan: sejauh mana Yehuda telah jatuh, sejauh itulah dia akan dipulihkan.

Kemusnahan Yehuda nampaknya satu tanda bahawa *“TUHAN telah menolak kedua-dua kaum yang dipilih-Nya”* (ayat 24). Orang-orang buangan Yehuda mula mempercayai hal ini adalah suatu yang mudah dibayangkan. Namun, Firman Tuhan menterbalikkan kepercayaan ini dengan mengisytiharkan *“TUHAN itu baik, kasih-Nya kekal selama-lamanya”*—dengan dosa, pemberontakan, dan penghakiman sekali pun.

Pemulihan yang dijanjikan kepada Yehuda memberi bayangan bagi janji penyelamatan Tuhan melalui Yesus Kristus, Tunas yang benar dari keturunan Daud. Dia akan menjadi pernyataan mutlak kasih kekal Tuhan, lantas memusnahkan kitaran dosa dan penghakiman Israel dan Yehuda. Sebagai umat Tuhan, kita boleh menanti dengan penuh harapan untuk hari di mana kita akan hidup dengan selamat di Yerusalem Baharu, kerana kedatangan-Nya sememangnya mutlak seperti malam dan siang (ayat 20).



Luangkan sedikit masa untuk mengaku kepada Tuhan bagaimana kita telah berdosa. Bersukacitalah dalam pengetahuan bahawa Dia baik dan kasih-Nya kekal selama-lamanya.

Tuhan, Penyelamat aku, terima kasih buat darah-Mu yang membersihkan dosa-ku. Semoga pengetahuan tentang kasih-Mu yang mengagumkan itu membentuk cara hidup aku hari ini. Amin.



Ahad Palma

Tuhan, Selamatkan Kita!

Bacaan Alkitab: Mazmur 118:1-2, 19-29

“Selamatkanlah sekarang, aku berdoa, ya TUHAN...” (Mazmur 118:25a; AVB)

Whoa - sungguh
tidak dijangka....

Hanya kerana Tuhan tidak
menepati jangkaan kita
(seperti yang kita ingini),
tidak bermakna Dia belum
mencapai melebihinya
(menerusi cara-Nya!)



Hal-Hal Yang Baharu

Bacaan Alkitab: Yesaya 42:1-9

“Lihat, hal-hal yang sudah terjadi dahulunya dan hal-hal yang baru akan Kuberitahukan. Sebelum hal-hal itu muncul, Aku mengkhabarkanya kepadamu.” (Yesaya 42:9; AVB)



Nubuat Yesaya yang berabad-abad lamanya sekarang ditujukan kepada Israel yang telah ditawan dan remuk—kata-kata penghakiman, kemudian kata-kata menenangkan. Fasal 41 tamat dengan kesia-siaan mendengar kata-kata nabi-nabi palsu; kemudiannya, fasal 42 bermula dengan “Lihatlah hamba-Ku...”

Lihat lah, dunia akan diperbaharui oleh seorang manusia. Dia tidak akan memperdengarkan suara-nya di jalan-jalan raya. Tidak seperti nabi-nabi yang mahu mendapat perhatian, Yesus tidak mencari kemuliaan. Orang ini akan “menegakkan keadilan” dengan kuasa-Nya yang diurapi Roh, namun Dia lemah lembut dan berbelas kasihan. Daripada bercakap kosong, Yesus akan membawa perubahan yang sebenar—keadilan di bumi. Kita, seperti Israel yang remuk, tidak perlu takut; Matius 12 memperkenalkan Yesus dengan kata-kata Yesaya: “*Sehelai rumput mensiang yang terkulai tidak akan dipatahkannya.*” Walaupun lilin harapan kita berkelip-kelip lemah, Yesus adalah Gembala Baik kita yang memegang kita dengan kasih sambil memperbaharui dunia ini.

Kita menginginkan ciptaan untuk berhenti mengerang—berakhirnya kemiskinan, bencana alam, dan ketidakadilan. Semua ini **akan** datang (Wahyu 21), tetapi lihat lah, pembaharuan telah bermula genapan-nya dalam Kristus, membawa terang ke dalam kehidupan kita yang digelapi dosa supaya kita boleh menyembah Pencipta yang benar. “Segala kemuliaan kepada Allah!” sementara kita menantikan hal-hal baru, sekarang dan di masa yang akan datang.



Bagaimanakah kita terdorong untuk berputus asa dan di manakah kita mencari pemulihan? Renungkan bagaimana hidup kita berbeza tanpa Yesus sebagai perjanjian yang membawa pengharapan baharu kita.

Gembala Baik, aku memuji Mu atas belas kasihan-Mu. Bantu aku untuk berharap hanya di dalam Mu supaya aku tidak akan goyah ketika meneruskan perlumbaan ini sehingga ke garis penamat. Amin.



Penebusan Sempurna Untuk Semua

Bacaan Alkitab: Yesaya 49:1-7

“Raja-raja akan melihat lalu bangkit berdiri, para penguasa akan sujud memberi hormat, kerana TUHAN yang setia... telah memilih engkau.” (Yesaya 49:7b; AVB)

Fasal 48 berakhir dengan Tuhan menggesa umat Israel untuk meninggalkan Babel—dari segi fizikal dan rohani. Mereka dipanggil untuk meninggalkan kehidupan mereka yang mengingkari Tuhan dan berdosa, dan sebaliknya bersukacita dalam penebusan mereka dari buangan. Meskipun

kedudukan geografi Israel berubah, hati rohani mereka masih kekal dalam dosa. Namun, fasal 49 mengingatkan kita tentang rancangan Tuhan yang menjangkau waktu dan tempat—rancangan-Nya tidak akan dihalang.

Yesus adalah penyelesaian kepada masalah Israel yang tidak ada kesudahannya. Yesaya tidak menyatakan **bagaimana** Hamba ini akan menyelamatkan, tetapi keputusannya jelas. Rancangan Tuhan sentiasa untuk mengumpulkan Israel kembali kepada Diri-Nya. Keagungan Tuhan **akan** kelihatan walaupun situasi bersifat tawar hati. Disalib, dicemuh, dihina, pengikut-pengikut-Nya bertempieran—pelayanan Yesus kelihatan sia-sia. Namun, Tuhan tetap berkuasa dan dapat mengubah situasi yang paling gelap menjadi kemenangan yang terbesar.

Rancangan penebusan Allah tidak terbatas kepada membawa umat Israel kembali ke Yerusalem, ataupun memalingkan hati umat Israel kepada-Nya—rancangan itu adalah penyelamatan yang akan “*sampai ke hujung bumi*” melalui Yesus, terang kepada bangsa-bangsa. Jadi kita bersukacita ke atas keluasan kasih Allah sambil menantikan hari di mana semua akan bertelut pada Yesus, Raja Hamba kita.



Sebagai pengikut-pengikut Kristus, kita adalah pembawa terang kepada dunia (Kisah Para Rasul 13:44-48). Sambil kita berusaha untuk mengikut Nya, bagaimana petikan ini membantu kita untuk berteguh hati apabila kita berasa tawar hati, tidak berdaya, dan takut?

Tuhan, aku memuji Engkau untuk rancangan-Mu yang berdaulat dan menjangkau waktu, tempat, hikmat, dan usaha manusia. Amin.

Erti Penderitaan Yang Benar

Bacaan Alkitab: Yesaya 50:4-9a

“Tidak kusembunyikan mukaku apabila diaibkan dan diludahi orang.” (Yesaya 50:6b; AVB)

Kita menilai kegelisahan Yesaya yang cuba mengerti penderitaan bangsa-nya yang dibuang negeri. Dia berbicara tentang Allah yang berkongsi pengalaman mereka sebagai seorang ‘hamba yang menderita’. Ini memberi pemahaman rohani dalam mengenang nyala rasa Yesus dan kemenangan-Nya yang muktamad dalam kebangkitan-Nya. Yesus ialah Hamba Yang Menderita yang dinubuat Yesaya.

Hamba Tuhan tidak menerima penderitaan secara pasif, tetapi secara aktif memilih penderitaan yang ‘benar’ apabila berhadapan dengan konflik. Bantuan Tuhan adalah sumber keyakinan dan pengharapan dalam penderitaan. Ayat 7 sama dengan doa Yesus di Taman Getsemani, *“Tetapi bukan kehendak-Ku melainkan kehendak-Mu dilaksanakan”* (Lukas 22:42).


Kita tidak dapat melihat masa depan, tetapi kita tahu bahawa semua orang menghadapi kesusahan dalam kehidupan. Kita boleh risau tentang masa depan atau, seperti Yesus, meletakkannya ke dalam tangan Bapa. Dengan menyerahkan kesusahan kita kepada Tuhan, kita mampu lebih daripada sekadar bertahan; kita mendapat kekuatan kerana mengetahui bahawa *“dalam semua hal Allah bekerja untuk kebaikan orang yang mengasihi Nya...”* (Roma 8:28; AVB).

Kita tidak memikul salib kita seorang diri. Yesus memikul salib dosa semua manusia. Dia menempuh jalan ke Kalvari supaya Dia dapat berjalan bersama kita hari ini, berkongsi dalam penderitaan kita, dan memimpin kita ke arah janji penebusan dan pembebasan.



Adakah kita percaya kepada Tuhan bahawa Dia akan sentiasa menjaga kita? Hanya begitu kita boleh mendapat damai sejahtera.

Tuhan, aku percaya bahawa Engkau akan menyimpan aku dalam damai sejahtera yang sempurna apabila aku menyerahkan segala beban-ku kepada Engkau yang telah menanggung dosa-ku supaya aku dapat diselamatkan. Amin.



Aksi Memperingati Adalah Untuk Memastikan Iman Terus Hidup

Bacaan Alkitab: Keluaran 12:1-14

“Hari ini akan menjadi hari yang harus kamu ingati. Kamu hendaklah merayakannya turun-temurun sebagai hari perayaan bagi TUHAN, dan perayaan itu hendaklah menjadi ketetapan buat selama-lamanya.” (Keluaran 12:14; AVB)

Pernah tertanya-tanya mengapa umat Israel harus makan “*dagingnya, yang sudah dipanggang di atas api... dengan roti yang tidak beragi serta sayur herba pahit*”? Mereka telah sapukan darah domba pada kedua-dua tiang pintu dan ambang setiap daun pintu; malaikat maut melintasi mereka. Darah itu menyelamatkan mereka. Jadi mengapa mereka harus menjamu domba? Malam Paskah hanya merupakan permulaan bagi umat Israel. Mereka sedang memulakan perjalanan yang jauh dan perlu memperingati rezeki yang dilambang oleh makanan ini—Allah akan menyediakan keperluan mereka.

Kita juga memerlukan makanan rohani daripada Yesus, Domba Paskah kita, di sepanjang perjalanan kita bersama Tuhan. Melalui kematian Yesus, dosa kita diampunkan dan dibersihkan. Ini telah menyelamatkan kita dari maut dan memberi kita hidup yang kekal. Tuhan menyediakan keperluan untuk perjalanan di hadapan kita—Perjamuan Kudus kurniaan Yesus memberi kekuatan dan pembaharuan yang diperlukan untuk sampai Kerajaan syurgawi.

Pada Hari Khamis Kudus, Yesus menunjukkan kasih-Nya yang muktamad kepada pengikut-pengikut-Nya dengan memecah-mecahkan roti yang melambangkan tubuh-Nya dan meminum wain yang melambangkan darah-Nya—perjanjian baharu yang menggenapi Paskah yang terakhir. Darah Yesus yang ditumpahkan dan tubuh-Nya yang diserahkan menjadi kurniaan rahmat untuk mengalami kehidupan baharu di dalam Nya. Dalam perjalanan menuju ke kekudusan, kita menghadap Kristus dengan lapar dan haus, dan berkongsi dalam persekutuan bersama Kristus dengan mengangkat salib kita untuk mengikut Dia.



Adakah kita ingin bersekutu dengan Kristus?

Yesus, aku tidak mahu sekadar dibersihkan oleh darah-Mu, tetapi dipupuk dengan mendalam dan diubah apabila aku menerima hadirat-Mu ke dalam diri-ku. Amin.



Dekat Salib Ku Berjaga Dan Menanti, Sentiasa Berharap Dengan Penuh Kepercayaan

Bacaan Alkitab: Yesaya 52:13-53:12

*“Dia dihina dan ditolak manusia, seorang yang penuh derita... Dia dihina sehingga orang menutup muka terhadap dia, dan kita pun menganggapnya tidak penting.”
(Yesaya 53:3; AVB)*

Yesaya menggambarkan Hamba Yang Menderita “seperti domba yang senyap di hadapan orang yang menggunting bulunya, maka dia tidak membuka mulutnya.” Terseksa, Yesus terus berdoa dalam diam sepanjang penderitaan-Nya. Hari ini, kita dijemput untuk menatap pemandangan yang paling hodoh: Yesus Kristus yang disalibkan—dalam kata-kata Yesaya, rupanya rosak, dianggap kena tulah, dihancurkan, ditindas.

Melihat di sebalik kesakitan dan penderitaan pada muka Anak Allah yang berdarah, kita bertemu dengan kasih yang tidak bersyarat. Kita melihat mata-Nya yang penuh belas kasihan melihat kita. Kita mendengar suara-Nya merayu kepada Bapa-Nya untuk mengampuni kita (Lukas 23:34). Di atas salib, Yesus mengucapkan segala yang ingin dikatakan; apa yang tinggal adalah ‘tujuh patah kata terakhir’ yang dihargai selama ini.

Kita mendengar janji-Nya yang penuh keyakinan, “*Apabila Aku diangkat tinggi di atas bumi, Aku akan menarik semua manusia kepada-Ku*” (Yohanes 12:32; AVB), dan kita ditawan oleh kasih yang paling baik, yang sekalipun menakluki maut. Menatap salib Kristus, hati kita menjadi lunak melihat belas kasihan Tuhan yang mendalam dan pengorbanan-Nya yang tanpa syarat untuk menebus dosa-dosa kita.



Adakah kita arif dalam mengenalpasti kehendak Tuhan yang terungkap dalam kehidupan kita? Perhatikan salib-salib yang dipikul di dalam hidup kita.

Yesus, aku mengangkat mata-ku kepada Mu dengan tangisan kerana menyebabkan penderitaan-Mu. Namun, aku memegang salib-Mu dengan sukacita yang tidak terkata. Kasih-Mu membawa Engkau ke sini, dan kasih-Mu lebih hebat daripada maut. Amin.



Belas Kasihan Tuhan... Baharu Setiap Pagi

Bacaan Alkitab: Ratapan 3:1-9, 19-24

“TUHAN ialah Pusakaku,” kata jiwaku, “sebab itu aku berharap kepada-Nya” (Ratapan 3:24; AVB)

Renungan ini menakutkan dan melemaskan dalam menggambarkan rasa derita dan terpenjara Yeremia: *“Dia menempatkan aku dalam kegelapan, seperti orang yang sudah lama mati. Dia memagari aku sehingga aku tidak dapat keluar...”* Kita diberitahu bahawa pusaka, bahagian, dan pengharapan kita adalah di dalam TUHAN—kasih setia-Nya, belas kasihan-Nya yang tidak berakhir, dan kesetiaan-Nya yang sungguh besar. Di manakah kasih setia Tuhan pada Sabtu Suci? Sabtu Suci adalah waktu Kristus turun ke neraka kehidupan kita, memecahkan belunggu Maut, dan membebaskan tawanan Alam Maut.

Maria memberi contoh di mana dia menangis secara diam di hadapan makam, tetapi tidak berputus asa. Kita juga menanti dengan sabar untuk ketakutan dikalahkan dan kita menerima terang pengharapan. Makam Sabtu Suci akan menjadi rahim Ahad Paskah. Ini adalah janji yang tersirat dalam setiap hati. Di dalam hadirat Kristus, gementar dan geletar Alam Maut akan menjadi kontraksi yang melahirkan hidup baru. Sambil berhadapan dengan kebimbangan dan ketidakpastian, kita duduk, berjaga-jaga, dan berdoa dengan penuh yakin bahawa Pemberi Janji akan menunaikan janji-Nya dan membebaskan kita untuk kehidupan baharu bersama Nya di syurga.



Adakah kita mengasihi TUHAN sebagaimana Kristus mengasihi? Kristus berkorban demi kita.

Bapa, Anak Engkau berehat di dalam makam pada Hari Sabat Suci ini; semoga kita juga menanti dan bangkit ke dalam kehidupan baharu bersama Dia yang hidup dan yang memerintah bersama Mu dan Roh Kudus. Amin.

Ahad Paskah

Bergembira lah!

Bacaan Alkitab: Yesaya 25:6-9

“Sesungguhnya, inilah Allah kita. Kita sudah menantikan Dia, dan Dia menyelamatkan kita! Inilah TUHAN. Kita sudah menantikan Dia! Mari kita bergembira dan bersukacita dalam penyelamatan yang dikurniakan-Nya!” (Yesaya 25:9; AVB)



Para Penyumbang

Siri Renungan Pra-Paskah ini adalah terjemahan daripada versi Bahasa Inggeris 'Lent Meditations 2021'. Lembaga Ibadat dan Muzik TRAC ingin menghargai para penyumbang (di mana ada nama yang tidak disenaraikan atas permintaan mereka) atas sumbangan mereka yang penuh tanggapan menarik dan diurapi doa.

Kiew Sieh Jin merupakan anggota Gereja Methodist Taman Ujong Seremban di mana beliau melayan sebagai pengkhotbah setempat, ketua ibadah, dan Kapten Briged Putera Seremban Kompeni ke-2.

Rev. Shearn Sya telah menceburi pelayanan sebagai paderi selama sembilan tahun. Kini beliau merupakan paderi Gereja Methodist Trinita Pulau Pinang. Beliau mempunyai beban untuk mengutamakan intipati dalam mengikuti Yesus yang mengatasi pelbagai ciri-ciri sekelilingnya.

Rhema Karasu-Rao beribadah dan melayan di Gereja Methodist Wesley Kuantan. Beliau bersemangat dan aktif dalam pelayanan ibadat dan muzik sambil berpegang teguh pada prinsip bahawa seluruh hidup sepatutnya memuja TUHAN.

Tay Hui Cheng beribadah di Gereja Methodist Wesley Taiping. Beliau merupakan bekas guru yang mempunyai jiwa yang mendalam bagi anak-anak muda.

Goh Kim Guat beribadah di Gereja Methodist Taman Ujong Seremban. Beliau bahagia apabila dapat membantu orang-orang lain tumbuh dalam perjalanan rohani mereka. Pada masa yang sama beliau sendiri terus belajar cara menjalani hidup yang disenangi Tuhan.

Tang Swee Kit beribadah di Gereja Methodist Trinita Petaling Jaya. Beliau ghairah akan panggilan-nya dalam membantu orang tumbuh dan mendalami perhubungan mereka dengan TUHAN. Beliau melayani sebagai pembantu pengarah di Institute for Christian Ministry (TRAC ICM), iaitu institusi yang fokus kepada pelayanan Kristian.

Allyna Ng adalah seorang graduan baharu dalam bidang guaman yang berasal dari Melaka. Kini beliau sedang melanjutkan pelajaran mengikuti Bar di London dan ingin pulang untuk berkhidmat demi Malaysia kelak.

Rev. Dr. Hermen Shastri merupakan pengamal keagamaan, pejuang keadilan sosial, dan pembina keamanan antara agama. Beliau mempunyai kelulusan PhD dalam Sacred Theology dari Universiti Heidelberg, Jerman. Kini beliau merupakan Setiausaha Agung bagi Majlis Gereja-Gereja Malaysia (CCM).

Gina Yap Lai Yoong (Penterjemah, Penyunting, Reka Bentuk & Atur Huruf) merupakan pakar komunikasi yang berkebolehan dalam bidang penulisan dan reka bentuk. Beliau mempunyai pengetahuan mendalam tentang buku-buku dan penerbitan. Untuk mengetahui lebih tentang beliau, layari www.ginayaplayoong.com

Juwita Suwito (Penyunting Bersama) merupakan seorang penyanyi dan penggubah lagu yang mempunyai jiwa penyembah. Beliau kini mempengerusikan Lembaga Ibadat dan Muzik TRAC dan beribadah di Gereja Methodist Damansara Utama Petaling Jaya.

Girly Wee (Penterjemah) merupakan anak Melaka yang mengikuti pengajian di Universiti Kebangsaan Malaysia dalam bidang Bahasa Melayu (Sarjana Muda Persuratan). Beliau merupakan guru Bahasa Melayu yang telah berkhidmat selama 36 tahun di sekolah kebangsaan dan kini sudah bersara. Beliau beribadah di Gereja Methodist Trinita Petaling Jaya.

Ho Gaik Kim (Penterjemah) adalah seorang pensyarah di Seminari Theoloji Malaysia. Beliau beribadah di Gereja Methodist Taman Asean Melaka.

Pr. Eddy Marson Yasir (Penterjemah) telah menceburi pelayanan sebagai pastor selama 20 tahun dan kini adalah pastor jemaah Bahasa Malaysia di Gereja Methodist Damansara Utama Petaling Jaya. Beliau memperoleh sarjana theoloji dari Seminari Theologi Malaysia dan mempunyai jiwa untuk pemuridan dan pembapaan generasi muda.

Sandra Tagal (Penterjemah) melayan Tuhan sepenuh masa di Gereja Methodist Damansara Utama Petaling Jaya di bahagian jemaah Bahasa Malaysia. Beliau sedang mengaji di Seminari Theologi Malaysia. Seorang yang rajin berdoa dan aktif dalam pelayanan seni kreatif, beliau bersukacita dalam membina ruang untuk orang lain bertumbuh dalam Tuhan.



Lembaga Ibadat dan Muzik

Trinity Annual Conference (TRAC)

2 Jalan 5/39, 46000 Petaling Jaya, Selangor, Malaysia

+603 7954 2836 | admin@trac.org.my | www.trac.org.my